

გამოყენებითი კვლევების საგრანტო პროგრამის კონკურსის პირობები

მუხლი 1. ზოგადი დებულებანი

1. გამოყენებითი კვლევების საგრანტო პროგრამა არის საქართველოს ეროვნული ინოვაციური ეკოსისტემის პროექტის (Georgia National Innovation Ecosystem – GENIE) შემადგენელი ნაწილი, რომელიც ხორციელდება მსოფლიო ბანკის დაფინანსებით და მიზნად ისახავს ხელი შეუწყოს:

- ა) კერძო, საჯარო და აკადემიური სექტორის თანამშრომლობით ინოვაციური საქმიანობასა და ციფრული ეკონომიკის განვითარებაში ჩართვას;
- ბ) ახალგაზრდა მეცნიერთა მიერ კოლაბორაციული გამოყენებითი კვლევების განხორციელებას;
- გ) ახალგაზრდა მეცნიერთა კვლევითი და ტექნოლოგიების ტრანსფერის უნარების გაძლიერებას;
- დ) კომერციული და ტექნოლოგიური ტრანსფერის პოტენციალის მქონე ინოვაციური კვლევების გამოვლენას, განვითარებასა და დანერგვას, რომლებიც მიზნად ისახავენ საქართველოს სოცო-ეკონომიკური გამოწვევების გადაჭრას ან/და გვთავაზობენ მსოფლიო მასშტაბის ინოვაციას.

2. კონკურსის ფარგლებში დაფინანსდება ინოვაციური კოლაბორაციული გამოყენებითი კვლევითი პროექტები. კონკურსზე წარმოდგენილი პროექტი ან პროექტით გათვალისწინებული აქტივობა არ შეიძლება იყოს უკვე განხორციელებული პროექტის ხელმძღვანელისა და/ან კვლევითი ჯგუფის მიერ რომელიმე (ეროვნული/საერთაშორისო) დონორი ორგანიზაციის დაფინანსებით.

3. კონკურსში მონაწილეობა და დაფინანსების მიღება ეზღუდება იმ პროექტებს, რომლებიც:

- ა) შეიცავს GENIE პროექტის ბუნებრივ და სოციალურ გარემოზე ზემოქმედების მართვის ჩარჩოში დასახელებულ რისკებს;
- ბ) თემატურად დაკავშირებულია: სამხედრო ან ბირთვულ ტექნოლოგიებთან; სპირტის ან თამბაქოს წარმოებასთან (ნებადართულია მევენახეობა, მეღვინეობის თემაზე კვლევები);
- გ) ითვალისწინებს ისეთ აქტივობებს, რომლებიც უკვე დაფინანსდა.

4. გამოყენებითი კვლევების საგრანტო პროგრამის კონკურსის ადმინისტრირება ხორციელდება საქართველოს განათლების, მეცნიერების, კულტურისა და სპორტის მინისტრის 2019 წლის 18 ნოემბრის N221/ნ ბრძანებით დამტკიცებული დებულების შესაბამისად.

მუხლი 2. კონკურსში მონაწილეობის პირობები და სუბიექტები

1. კონკურსში მონაწილეობის უფლება აქვს პროექტის ძირითად პერსონალს (მკვლევართა ჯგუფს),

რომელსაც გააჩნია მასპინძელი ორგანიზაციის მხარდაჭერა კვლევისათვის საჭირო მატერიალურ-ტექნიკურ ბაზაზე წვდომისათვის.

2. ძირითადი პერსონალის სახით, კონკურსში მონაწილეობა და გრანტის მიღება შეუძლიათ ფიზიკურ პირებს, რომლებიც წარმოადგენენ კვლევით და კერძო სექტორს და ასრულებენ პროექტით დაგეგმილ ძირითად ამოცანებს. ძირითადი პერსონალი შეიძლება იყოს მაგისტრის, დოქტორის ან მათთან გათანაბრებული აკადემიური ხარისხის მქონე პირი, ასევე მაგისტრატურის ან/და დოქტორანტურის სტუდენტი;

3. პროექტს უნდა ჰყავდეს პროექტის ხელმძღვანელი - დოქტორის ან მასთან გათანაბრებული აკადემიური ხარისხის მქონე პირი პროექტის ძირითადი პერსონალიდან, მკვლევართა ჯგუფის ლიდერი, რომელიც კოორდინაციას უწევს პროექტის შედგენას, პროექტით გათვალისწინებულ კვლევას და პასუხისმგებელია, როგორც პროექტის სამეცნიერო შედეგებზე, ისე პროექტით გათვალისწინებული საქმიანობის ანგარიშგებაზე;

4. პროექტის ძირითადი პერსონალის მინიმუმ 50%-ს უნდა შეადგენდნენ ახალგაზრდა მკვლევარები - მაგისტრის/დოქტორის ან მათთან გათანაბრებული აკადემიური ხარისხის მქონე პირები ძირითადი პერსონალიდან, რომელთა აკადემიური ხარისხის მინიჭების დღიდან კონკურსის გამოცხადების დღემდე გასულია არაუმეტეს 7 წელი, ასევე მაგისტრატურის ან/და დოქტორანტურის სტუდენტები.

5. პროექტში ჩართულნი უნდა იყვნენ კვლევის შესაბამისი კერძო სექტორ(ებ)ის წარმომადგენლები, რომლებიც უნდა შეადგენდნენ ძირითადი პერსონალის არაუმეტეს 25 %- ს.

6. პროექტს შესაძლოა ჰყავდეს დამხმარე პერსონალი – ძირითადი პერსონალის დასახმარებლად პროექტის ფარგლებში დასაქმებული სამეცნიერო-ტექნიკური სამუშაოების განმახორციელებელი პირ(ებ)ი. დაუშვებელია, დამხმარე პერსონალის ფუნქციები შეითავსოს პროექტის ძირითადმა პერსონალმა ან/და დამხმარე პერსონალმა შეითავსოს ძირითადი პერსონალის ფუნქციები.

7. პროექტს უნდა ჰყავდეს მასპინძელი ორგანიზაცია – საქართველოს კანონმდებლობის შესაბამისად შექმნილი იურიდიული პირი სამეცნიერო-აკადემიური სექტორიდან, რომლის წესდებით/დებულებით განსაზღვრული მიზანია სამეცნიერო კვლევების განხორციელება. მასპინძელი ორგანიზაცია უზრუნველყოფს პროექტის ძირითად და დამხმარე პერსონალს პროექტით გათვალისწინებული მატერიალურ-ტექნიკური ბაზით.

მუხლი 3. კონკურსში მონაწილეობის წესები და საკონკურსო დოკუმენტაცია

1. საგრანტო კონკურსში მონაწილეობისათვის რეგისტრაცია ხორციელდება ორ ეტაპად:

ა) ელექტრონული რეგისტრაცია – 2019 წლის 19 დეკემბრის 18:00 საათამდე;

ბ) ფონდის კანცელარიაში რეგისტრაცია – 2019 წლის 20 დეკემბრის 16:00 საათამდე.

2. ელექტრონული რეგისტრაციის ეტაპზე საჭიროა ფონდის გრანტების მართვის ერთიან სისტემაში - GMUS [Grants Management Unified System] (ბმული: <http://gmus.rustaveli.org.ge>) ელექტრონულად დარეგისტრირდეს: პროექტის მასპინძელი ორგანიზაცია, ძირითადი პერსონალი და პროექტი.

3. მასპინძელმა ორგანიზაციამ GMUS-ში უნდა შექმნას/შეავსოს „ორგანიზაციის პროფილი“ და წარმოადგინოს შემდეგი დოკუმენტები:

- ა) სსიპ-ს შემთხვევაში - დაფუძნების დოკუმენტი;
- ბ) ა(ა)იპ-ის და შპს-ს (უსდ) შემთხვევაში - ორგანიზაციის წესდება და ამონაწერი მეწარმეთა და არასამეწარმეო (არაკომერციული) იურიდიული პირების რეესტრიდან (მიმდინარე წლის მდგომარეობით).

4. ძირითადი პერსონალის ყველა წევრმა GMUS-ში უნდა შექმნას/შეავსოს „მეცნიერის პროფილი“ და წარმოადგინოს შემდეგი დოკუმენტები:

- ა) აკადემიური ხარისხის დამადასტურებელი დოკუმენტები (დიპლომი, სერტიფიკატი, დოქტორანტის / მაგისტრანტის შემთხვევაში ცნობა სწავლის შესახებ სტუდენტის შესაბამისი უმაღლეს საგანმანათლებლო დაწესებულებიდან, 2019 წლის შემოდგომის სემესტრის მდგომარეობით); საქართველოს მოქალაქე პირებისათვის, თუ აკადემიური ხარისხის დამადასტურებელი დოკუმენტი უცხოეთშია გაცემული, მას თან უნდა ერთვოდეს უცხოეთში მიღებული განათლების აღიარების დოკუმენტი, გაცემული „სსიპ - განათლების ხარისხის განვითარების ეროვნული ცენტრის მიერ. საბჭოთა კავშირის არსებობის პერიოდში გაცემულ დოკუმენტს არ სჭირდება ქართული თარგმანი და აღიარება. უცხო ქვეყნის მოქალაქე ძირითადი პერსონალის აკადემიური ხარისხის დამადასტურებელ დოკუმენტს უნდა ახლდეს მისი ნამდვილობის დამადასტურებელი დოკუმენტი ან აკადემიური ხარისხი უნდა დასტურდებოდეს იმ ინსტიტუციის ოფიციალური ვებგვერდით/ცნობით, რომელშიც ის მოღვაწეობს.
- ბ) ცნობა სამსახურიდან (სამეცნიერო-კვლევითი სექტორიდან ან ბიზნეს სექტორიდან). უცხო ქვეყნის მოქალაქე ძირითადი პერსონალის შემთხვევაში საკმარისია მისი სამუშაო ინსტიტუციის ოფიციალური ვებგვერდის ბმული, საიდანაც დასტურდება მისი დასაქმება.

5. პროექტის ხელმძღვანელი GMUS-ში გამოყენებითი კვლევების საგრანტო პროგრამის კონკურსზე არეგისტრირებს პროექტს, რისთვისაც საჭიროა ქართულ და ინგლისურ ენებზე წარმოადგინოს:

- ა) კრებსითი ინფორმაცია (ნიმუში - დანართი №2), რომელიც ივსება GMUS-ში პროექტის რეგისტრაციის დროს და ზუსტად ასახავს საპროექტო წინადადების საკვანძო ინფორმაციას;
- ბ) საპროექტო წინადადება (დანართი №3);
- გ) ცნობა თანადაფინანსების შესახებ (ასეთის არსებობის შემთხვევაში) იურიდიული ან ფიზიკური პირის მიერ გაცემული. თანადაფინანსების ცნობა წარმოდგენილი უნდა იყოს ორგანიზაციის ოფიციალურ ბლანკზე ან დანართი №4-ის ფორმით, დამოწმებული უფლებამოსილი (იურიდიული ან ფიზიკური) პირის ხელმოწერითა და ორგანიზაციის ბეჭდით (ასეთის არსებობის შემთხვევაში). თუ დოკუმენტის ორიგინალი გაცემულია ინგლისურ ენაზე, აუცილებელია, მისი ქართული თარგმანი დამოწმებული იყოს თარჯიმანთა ბიუროს მიერ. სავალდებულოა, ცნობაში მითითებული იყოს თანადაფინანსების თანხა და მიზნობრიობა;

6. GMUS-ში დოკუმენტები იტვირთება PDF ფაილის სახით.

7. ფონდის კანცელარიაში რეგისტრაციის ეტაპზე საჭიროა შემდეგი დოკუმენტების წარმოდგენა:

ა) „კონკურსში მონაწილეობის შესახებ განცხადება“ (ნიმუში - დანართი №5, გენერირდება GMUS-დან) დამოწმებული შესაბამისი ხელმოწერებითა და მასპინძელი ორგანიზაციის ბეჭდით (ასეთის არსებობის შემთხვევაში);

ბ) განცხადებაზე უცხოეთის მოქალაქე ძირითადი პერსონალის ხელმოწერის არ ქონის შემთხვევაში, განცხადებას თან უნდა ერთვოდეს აღნიშნული პირის თანხმობის წერილის ორიგინალი ხელმოწერით დადასტურებული და მისი ქართული თარგმანი თარჯიმანთა ბიუროს მიერ დამოწმებული. თანხმობის წერილით უნდა დასტურდებოდეს, რომ პირი გაეცნო კონკურსის პირობებს და თანახმაა კონკურსში მონაწილეობაზე.

8. საკონკურსო დოკუმენტაცია წარმოდგენილი უნდა იყოს ამ ბრძანებით დამტკიცებული წესების, ფორმებისა და ვადების დაცვით;

9. პროექტის სრულყოფილად წარმოდგენაზე, ქართული და ინგლისური ვერსიების იდენტურობასა და თარგმანის ხარისხზე პასუხისმგებელია პროექტის ხელმძღვანელი.

მუხლი 4. კონკურსში მონაწილეთათვის დამატებითი სახელმძღვანელო დოკუმენტები

1. GENIE პროექტის ბუნებრივ და სოციალურ გარემოზე ზემოქმედების მართვის ჩარჩო;
2. კონკურსში წარმოდგენილი პროექტით გათვალისწინებული კვლევის სამეცნიერო მიმართულება/ქვემიმართულებები განისაზღვრება ფონდის გენერალური დირექტორის წინამდებარე ბრძანებით დამტკიცებული სამეცნიერო მიმართულებების კლასიფიკატორით (დანართი №6);
3. პროექტის ბიუჯეტის დაგეგმვისათვის ხარჯვითი კატეგორიები განიმარტება ფონდის გენერალური დირექტორის წინამდებარე ბრძანებით დამტკიცებული ბიუჯეტის კლასიფიკატორით (დანართი №7).

მუხლი 5. კონკურსის ადმინისტრირება

1. კონკურსის ადმინისტრირება მოიცავს შემდეგ ეტაპებს:
 - ა) საგრანტო კონკურსის გამოცხადება;
 - ბ) კონკურსში მონაწილეობის მისაღებად პროექტების წარდგენა ფონდში;
 - გ) კონკურსში მონაწილე პროექტების შესაბამისობის დადგენა კონკურსის მიზნებისათვის დადგენილ მოთხოვნებთან;
 - დ) პროექტების შეფასება;
 - ე) დასაფინანსებლად შერჩეული პროექტების დამტკიცება;
 - ვ) საგრანტო ხელშეკრულებების გაფორმება და გრანტის გაცემა.
2. საკონკურსოდ განიხილება მხოლოდ ის პროექტი, რომელსაც დადგენილი ვადებისა და წესების დაცვით გავლილი აქვს ელექტრონული რეგისტრაცია და ფონდის კანცელარიაში წარმოდგენილი აქვს შესაბამისად დამოწმებული „განცხადება კონკურსში მონაწილეობის შესახებ.“

3. კონკურსზე რეგისტრირებული პროექტების საქართველოს განათლების, მეცნიერების, კულტურისა და სპორტის მინისტრის 2019 წლის 18 ნოემბრის N221/ნ ბრძანებით დამტკიცებული კონკურსის მიზნებისათვის დადგენილ მოთხოვნებთან შესაბამისობის შემოწმების მიზნით ფონდი ჩაატარებს წარმოდგენილი დოკუმენტაციის ტექნიკურ ექსპერტიზას, დაადგენს ხარვეზს და იმოქმედებს კანონის შესაბამისად.

3. ფონდი უფლებამოსილია კონკურსის ნებისმიერ ეტაპზე კონკურსიდან მოხსნას პროექტი, თუ იგი არ შეესაბამება კონკურსის მიზნებისათვის დადგენილ მოთხოვნებს, ან საკონკურსო დოკუმენტაცია წარმოდგენილია არასრულყოფილად, ან წარმოდგენილია დადგენილი ფორმებისა და ვადების დარღვევით, ან შეიცავს ყალბ ინფორმაციას.

4. პროექტების შეფასება განხორციელდება 2 ეტაპად, საქართველოს განათლების, მეცნიერების, კულტურისა და სპორტის მინისტრის 2019 წლის 18 ნოემბრის N221/ნ ბრძანების მე-7 და მე-8 მუხლებით დადგენილი წესებით.

5. შეფასების ორივე ეტაპის შედეგები გამოქვეყნდება ფონდის ვებ-გვერდზე.

მუხლი 6. კონკურსში გამარჯვებულის გამოვლენა

1. კონკურსში გამარჯვების შემთხვევაში პროექტის ავტორებმა ფონდის კანცელარიაში უნდა წარმოადგინონ:

ა) კონკურსში გამარჯვებული პროექტისათვის გახსნილი მიზნობრივი საბანკო ანგარიშის (ლარის) რეკვიზიტები, რომელზეც განხორციელდება მხოლოდ პროექტთან დაკავშირებული საბანკო ოპერაციები და არ დაირიცხება სხვა სარგებელი

ბ) თანადაფინანსების ცნობის (ასეთის არსებობის შემთხვევაში) ორიგინალი – თუ ცნობის ორიგინალი უცხოენოვანია, მას თან უნდა ერთვოდეს ქართული თარგმანი დამოწმებული თარჯიმანთა ბიუროს მიერ.

2. ფონდი უზრუნველყოფს საგრანტო ხელშეკრულების გაფორმებასა და პროექტის განხორციელების მონიტორინგს საქართველოს განათლების, მეცნიერების, კულტურისა და სპორტის მინისტრის 2019 წლის 18 ნოემბრის N221/ნ ბრძანების მე-9, მე-10 და მე-11 მუხლებით დადგენილი წესებით.

მუხლი 7. დამატებითი მოთხოვნები გრანტის მიმღებთა მიმართ

1. გრანტის მიმღებმა უნდა უზრუნველყოს:

ა) პროექტით გათვალისწინებული მოსალოდნელი შედეგების კომერციული და ტექნოლოგიური ტრანსფერის პოტენციალის განვითარება;

ბ) ახალგაზრდა მეცნიერთა კვლევითი და ტექნოლოგიების ტრანსფერის უნარების გაძლიერება, აქტივობების განხორციელება როგორც კვლევით, ასევე შესაბამის ინდუსტრიულ გარემოში.

2. პროექტის ფარგლებში განხორციელებული კოლაბორაციული გამოყენებითი კვლევის საფუძველზე უნდა შეიქმნას ინტელექტუალური საკუთრება (პატენტი, სასარგებლო მოდელი, პროტოტიპი, პროგრამული უზრუნველყოფა, აპლიკაცია, ახალი მასალები, სამედიცინო პროდუქტი,

მოწყობილობა, ახალი ტექნოლოგია, საავტორო უფლება და სხვა).

3. პროექტის ფარგლებში შექმნილი ნებისმიერი ახალი ინტელექტუალური საკუთრება და “Know how” ეკუთვნის მკვლევართა ჯგუფს, რომელიც თავის მხრივ ვალდებულია დაიცვას საკუთრების უფლება მესამე პირთან ხელშეკრულების გაფორმებისას.

4. საგრანტო პროექტის ფარგლებში განხორციელებული კვლევის შედეგების ამსახველ პუბლიკაციებში (სტატია, მონოგრაფია, საკონფერენციო აბსტრაქტი და ა.შ.) სავალდებულოა მითითებული იყოს, რომ კვლევა განხორციელდა „შოთა რუსთაველის საქართველოს ეროვნული სამეცნიერო ფონდის მხარდაჭერით [გრანტის ნომერი ...]“ / „This work was supported by Shota Rustaveli National Science Foundation of Georgia (SRNSFG) under GENIE project [grant number ...]“. იმ შემთხვევაში, თუ გამოქვეყნებულ პუბლიკაციაში არ იქნება ასახული ზემოაღნიშნული ინფორმაცია, წარმოდგენილი დოკუმენტი არ განიხილება ფონდის მიერ პროგრამული მონიტორინგის განხორციელებისას. ერთ პუბლიკაციაზე შესაძლებელია მითითებული იყოს ფონდის მიერ გაცემული მხოლოდ ერთი გრანტის ნომერი.

4. საგრანტო პროექტის ფარგლებში შექმნილ ვიზუალურ პროდუქციაზე (ნაბეჭდო, ფოტო, აუდიო, ვიდეო, ელექტრონულ პროდუქციაზე და ვებგვერდზე) სავალდებულოა განთავსდეს შოთა რუსთაველის საქართველოს ეროვნული სამეცნიერო ფონდის ლოგო და მითითებული იყოს, რომ საგრანტო პროექტი განხორციელდა “შოთა რუსთაველის საქართველოს ეროვნული სამეცნიერო ფონდის მხარდაჭერით GENIE პროექტის ფარგლებში”.

5. ფონდი უფლებამოსილია გრანტის მიმღებთა მიერ წარდგენილი პროექტის აბსტრაქტი, პროგრამული ანგარიშები და ბეჭდვითი ან/და ვიზუალური მასალები გამოიყენოს საკუთარი საქმიანობის ანგარიშში, ბეჭდვით და ელექტრონულ გამოცემებში, განათავსოს ფონდის ვებგვერდებზე.

6. შესაძლებელია, პროექტის ფარგლებში განხორციელებული კვლევების მასალებზე გამოქვეყნდეს პუბლიკაცია საერთაშორისო რეფერირებად და ციტირებად გამოცემაში ან წიგნი, რომელიც დამტკიცებული იქნება დარგობრივი სარედაქციო/ საგამომცემლო/სამეცნიერო/აკადემიური საბჭოს, ან მასთან გათანაბრებული სტრუქტურის მიერ.